

文

館

詞

林

文館詞林卷第六百六十二

中書令李寶嘉修國史弘文館學士桂國高陽郡開國公臣許敬宗等奉敕撰

太宗文皇帝伐遼手詔一首

漢武帝欲伐匈奴詔一首

答淮南王諫伐越詔一首

魏文帝論伐吳詔二首

魏常道鄉公伐蜀詔一首

西晉武帝伐吳詔一首

答杜預征吳節度詔一首

東晉明帝北討詔一首

東晉成帝北討詔一首

東晉安帝征劉毅詔一首

後魏孝文帝戒師詔一首

出師詔一首

後魏節閔帝伐爾朱文暢等詔一首

後魏孝靜帝伐元神和等詔一首

宋順帝西討詔一首

南齊明帝北伐纂嚴詔一首

梁武帝北伐詔一首

又北伐詔一首

北齊文宣帝征長安詔一首

西伐詔一首

後周武帝伐北齊詔二首

太宗文皇帝伐遼手詔一首

門下行師用兵古之常道取亂侮亡先哲所貴高麗莫離支  
蓋蘇文弑逆其主酷害其臣竊據邊隅肆其蜂蠆朕以君臣  
之義情何可忍若不誅翦遐殲無以懲肅中華今故欲巡幸  
幽荆問罪遼碣行止之宜務存節儉所過營頓無勞精節食  
唯充飢不須珍膳水可涉渡者無假造橋道路通行者不用  
修理御營非近州學生老人等無煩迎謁恐無勞擾弊於往  
來昔隋室淪亡其源可觀良由智略乖於遠圖兵士疲於萬  
屢戰政令失度上下離心德澤不加於匹夫刻薄彌窮於萬  
姓當此時也高麗之主仁愛其口仰之如父母煬帝殘暴其

眾故眾視之如仇讎以思亂之軍擊樂安之卒務其功也不  
亦難乎何入水而惡其濡踐雪而求無跡朕緬懷前載撫躬  
內省昔受鉞專征提戈撥亂師有經年之舉食無盈月之儲  
軍之餘資朝不供夕至於賞罰之信尙非自決於心然猶所  
向風靡前無橫陳蕩氛霧於五岳翦豺狼於九野定海內拯  
蒼生使萎霜之草復含翠色將朽之骨重反豐飢然則行軍  
用兵之事皆億兆之所親見豈虛言哉及至端拱嚴廊定策  
帷扈身處九重之內謀決萬里之外北殄匈奴種落有若摧  
枯西滅吐谷渾高昌易於拾芥苞絕漠而爲苑跨流沙以爲  
池黃帝不服之口唐堯不臣之域並皆委質奉貢歸風順軌  
然則崇威啟化之迫此亦天下所共聞也況今豐稔多年家

給人足餘糧栖畝積粟紅倉雖足以爲兵儲猶恐勞於轉運  
故多驅牛羊以充軍食人無裹糧之費衆有隨身之稟如斯  
之事豈不優於曩日加以躬先七萃親決六奇使攻無所守  
戰無所拒略言其數必勝之道蓋有五焉一曰以我大而擊  
其小二曰以我順而討其逆三曰以我治而乘其亂四曰以  
我逸而敵其勞五曰以我悅而當其怨何憂不剋何慮不摧  
可使布告元元勿爲疑懼耳

漢武帝欲伐匈奴詔一首

制詔朕飾子女以配單于金幣文繡賂之甚厚單于待命加  
嫚侵盜無已邊境被害朕甚閔之今欲舉兵攻之何如

答淮南王安諫伐越詔一首

皇帝問淮南王使中大夫王上書言事聞之朕奉先帝之休  
德夙興夜寐明不能燭重以不德是以比年凶災害衆夫以  
眇眇之身託于三侯之上內有飢寒之人南夷相攘使邊騷  
然不安朕甚懼焉今王深惟重慮明太平以弼朕失稱三代  
至盛統天接地人迹所及咸盡賓服藐然甚慙嘉王之意靡  
有所終使中大夫助論朕意告王越事

魏文帝論伐吳詔二首

制詔昔軒轅不爲涿鹿之師則蚩尤之妖不滅唐堯不興丹  
水之陳則南蠻之難不平漢武不行呂嘉之罰則橫浦之表  
不附光武不加囂述之誅則隴蜀之亂不清故曰非威不服  
非兵不定孫權小醜憑江恃暴因有外心凶頑有性故奮武

銳順天行誅驍騎龍驤猛將武步或修句踐潛涉之口頑或  
圖韓信夏口之誑愚接船以水攻陳六軍以陸橫擊征南進  
運以圍江陵多獲舟船斬首執俘降者盈路牛酒日至大司  
馬及征東諸將卷甲長驅其舟隊今已向濟今車駕自東爲  
之瞻鎮雲行天步乘釁而運賊進退道迫首尾有難不爲楚  
靈乾谿之潰將有彭寵蕭王之變必自魚爛不復血刃宜慎  
終節動靜以聞

制詔昔軒轅建四面之號周武稱予有亂十人斯蓋先聖所  
以體國君人亮成天工多賢爲貴也今內有公卿以鎮京師  
外設牧伯以監四方至於元戎出征則軍中宜有柱石之賢  
帥輜重所在又宜有鎮守之重臣然後車駕可以周行天下



無內外之慮吾今當征賊欲守之積年其以尙書令顯鄉侯  
陳羣爲鎮軍大將軍尙書僕射西鄉侯司馬懿爲撫軍大將  
軍若吾臨江授諸將方略則撫軍當留許昌督後諸軍錄後  
臺文書事鎮軍隨車駕當董督行尙書事皆假節鼓吹給中  
軍兵騎六百人吾欲去江數里築宮室往來其中見賊可擊  
之形便出奇擊之若或未可則當紓六軍以遊獵饗賜軍士  
魏常道鄉公伐蜀詔一首

制詔蜀叢爾小國土狹人寡而姜維虐用其衆曾無廢志往  
歲破敗之後猶復耕種沓中刻剝衆羌勞役無已人不堪命  
夫兼弱攻昧武之善經致人而不致於人兵家之上略蜀所  
恃賴唯維而已因其遠離巢窟用力爲易今使征西將軍鄧

艾督率諸軍趨甘松沓中以羅取維雍州刺史諸葛緒督軍  
趨武街高樓首尾蹙討若禽維便當東西並進埽滅巴蜀也  
西晉武帝伐吳詔一首

制詔兵興以來八十餘年戎車出征罔有寧歲死亡流離傷  
害和氣朕每惻然悼心思戢兵靜役與人休息故罷習業廣  
分休假大遣扶老養孤及女朝夕相對而吳賊失信比犯王  
略胡虜校動寇害邊郵人兵欽少不足禽制輒當前休中土  
以相應赴將士疲悴而猶不及事欲以爲靜而更爲勞昔淮  
夷不賓成王東伐獫狁作難戎車夏征自古及今咸皆勤戎  
遠戍先勞後逸未有得修無爲於有事之時也自宣皇帝以  
來每以吳蜀爲憂邊事爲念今孫皓犯境夷虜擾邊此乃祖

考之遺慮朕身之大恥也故繕甲修兵大興戎政內外勞心  
上下勦力以南夷旬吳北威戎狄然乃得休牛放馬與天下  
共饗無爲之福耳今調諸士家有二丁三丁取一人四丁取  
二人六丁以上三人限年十七以上至五十以還先取有妻  
息者其武勇散將家亦取如此比隨才署武勇慘吏樂市馬  
爲騎者署都尉司馬中閒以來內外解弛吏寡盡忠之心將  
無致命之節朕方靜人用未加罪戮今當大修戎政以混壹  
六合賞功罰情明罰整法其宣敕中外羣官使各悉心畢力  
明爲身計主者以時施行條品

西晉武帝答杜預征吳節度詔一首

制詔夫悅以犯難人忘其死此用兵之本若乃臨戎致果則

必茲之以牲斷之以威故商令主告誓其衆用命賞於祖不用命戮于社昔魏降穰苴列國陪臣苟有犯其政令者雖親如揚干莊賈皆戮之不疑用能尊主立勳垂聲載籍今廣命羣帥凌江致討將以靜齊南裔綏寧四海蓋鷹揚哮闕之士成功之一會也可不勗哉懸旌萬里當令首尾協同此旣然矣且元帥所統或本不相督威令教禁素不服習若名任所見不相順從必顛越不振以疚大事兵凶戰危呼吸成變可不慎耶斯乃三軍之命國之安危苟有乖遺以致負敗雖要領之罰必加鈇鉞之誅必用固無及矣是故投之死地而後生蓋知亡必存也人敢殺人而萬夫齊勇蓋自古之政也方岳元帥推轂所委若需濡縱法忘在公之義上愆國命下墜

徒衆雖悔身何及凡所督敢距違節度便以軍令從事書稱  
宣力汝爲又曰尙桓桓如武如繩如熊如羆軍司將軍其各  
勉之申勒羣帥以下使知此命

東晉明帝北討詔一首

制詔昔魏絳撫和諸戎郅都魏尙威懾匈奴故封疆之任在  
於得才漢文所以思廉頗李牧也單于慕容廆不遠萬里請  
吏率職禮讓忠義著之遐朔欲勦力國難翦滅長虵宜得名  
臣英才以董統之使一時齊舉致討寇庭此聲實並振雖越  
在海外其狀若身手矣尙書廣陵公眭弘量淹濟識謀經通  
文武著於勳績忠誠每思立事可委以重任使朕無北顧之  
憂者也其以眭持節督幽平并州諸軍事領護東夷校尉鎮

東將軍平州刺史公如故主者假授諸所應供給及信風引道

東晉成帝北討詔一首

制詔戎夷猾夏神州傾覆二帝辭宮幽沒虞廷永言厥艱夙夜慨憤自聞江表屢有事故剋平內難始漸夷泰征伐事大役不再舉是以廟算待期畜力觀釁今羯寇衰弊王略彌振時至理盡天人立應大將軍涼州刺史西平公駿忠勳三代義誠壯烈總帥秦涼爲國宣力今遣健步剋同征舉宜令影響相應萬里齊契其先普告遠近征鎮牧守諸軍並令誠嚴須使還進討蕩滌區宇以雪國恥其忠臣義士徇功效命必如殊賞以旌勳節

東晉安帝征劉毅詔一首

宋傅亮

制詔劉毅傲很凶戾履霜已久中興覆敗宜卽顯戮晉法含  
弘復蒙寵授曾不思愆內訟怨望滋甚賴宰輔藏疾特加遵  
養遂復推轂陝西庶能感革心而長惡不悛志爲姦究陵上  
虐下縱逸無度旣解督任江州非復所統撥從兵眾略取租  
運驅斥舊戎厚樹親黨西府二局文武盈萬悉皆割留曾無  
片言肆情恣慾罔顧天明又與從弟蕃遠相景響招聚剽狡  
繕甲修兵外託省疾實規伺隙同惡相濟圖會荆郢尙書左  
僕射謝混憑藉□資超蒙殊遇而佻躁銳職爲亂階扇動外  
日連謀萬理是而可思孰不可懷己詔太尉隨宜剪戮諸所  
處分一委公高算

後魏孝文帝戒師詔一首

門下夫出征有嘉故正邦之象興焉王赫斯怒蓋篤周之祐  
明矣夫然則蚩尤之戰不亦宜乎變伐之功豈非茂歟是以  
乾儀雖眇景曜莫殊坤壤雖廓皇輝罔二昔尉佗僭越終屈  
漢命孫皓跨吳竟歸晉師斯乃天地之常運人理之恆數耶  
今蕭氏篡竊江會未賓王化土有二王之嫌物無一同之慶  
人神所以憤惋於幽顯靈祇所以咨嗟於昏明彼旣得非用  
順又守不以仁逆君之罪未忘於南嶽虐叱之政已形於北  
京難遇之機於茲莫再矣朕承考列累聖之隆猷猥屬後仁  
必伐之嘉運仰稟先后慈聖之誨俯賴侯辟匡弼之誠四海  
熙寧八表邕泰謨明聘智之臣競思於廟堂爪牙折衝之將



揮袂於陞闕玉燭休和士卒殷溢此而不舉孰復可也是故夙夜慨慮寢寐靡輟將欲仰順天心俯拯毗物布德宣風躬接江漢翦僞勃於荆揚蕩不臣於岷越混茲文軌載昌皇業上答祖宗傳授之意下副黔兆傾戴之心然與師動戎必須豫策振威舉旆實待儲伏可敕尙書八坐與三公詳議軍資邊實之宜介冑戈稍之用皆令修備使有征無戰臨事果稱不亦善乎

後魏孝文帝出師詔一首

門下蕭鸞悖道反德唱逆滔天往齡順動鼓鐘彰罰僞朝將相請虔聘貢南冠東琛許在旬日朕以大道崇寬海量無細慙彼蒼生徒羅厥擾故開天墜煦盪地容瑕歸風之際聽其

祇遣而禍迷狂心天棄虐政不知事大以衛社稷旋生微詭  
反以我讎頓辱主人前主之使怒甲及乙妄生鋒牟鬱飯臭  
魚以儆行李食言爽信遂絕踐好內離九族之親外杜強鄰  
之援表裏俱失不亡何待所謂我直彼曲人神同憤者也將  
興行天伐誓殄逋篡然討國混化功爲至遠不可曰一舉指  
期吳員有言三師以肆楚必道弊誠哉茲談可不驗歟今歲  
便敕豫郢東荆東豫東郢南兗南徐東徐等嚴兵勒眾南入  
揚威迎降納附廣張聲略果有機也遂爲龍驤之捷如未可  
焉且爲示德之師皆仰刺史躬率戎首若致稽疑軍法從事  
一二亦有別敕耳又詔徐兗光南青荆洛纂備戎事應召必  
赴臨命淹闕國有常刑

後魏節閔帝伐爾朱文暢等詔一首

魏收

門下有國有家必以賞罰爲本或王或霸莫不崇明軌律眇  
自前古下至於今喪亂之來咸由此道自永安失馭天下橫  
流爾朱宗屬分割海內不臣著於遠近社稷傾於旦夕蒼生  
荼苦冠帶寒心大丞相渤海王忠義通神靈武冠代大惟宗  
祏之重深愍黎庶之怨定策啟行被堅執銳摧羣醜於鄴南  
東凶鬼於洛下惡黨梟懸人神明目故天柱大將軍榮所有  
諸子實惟逆徒論之典刑義不蠲免尸口腰斬執曰非宜相  
王顧敦仁厚之風深存契闊之義朝政乃屈法申恩時主則  
成人之美全其門戶赦其骸骨血祀獲保家業不墜擊鐘鼎  
食家成市里母則尊稱長主鑒傾戚屬二子爵窮十等位居

八命荷國家山嶽之惠受相王子弟之恩谿壑其心罕知盈  
足朝市懾其威福州郡拘其託請傷風害政布於人言永不  
悛改終無□畏自卯成翼從裁及拱持此童昏早濫王爵誠  
是國朝後追往效莫非相王覆育之厚且託陰不折其枝過  
食不毀其器豈有受人令濟之貸託人姻媾之親而招此蠢  
愚構茲姦逆潛署位號身爲魁戴趙趨侏張圖成反噬此而  
可忍孰不可懷朕以寡德君臨萬寓今者南越江湖北窮沙  
漠東踰遼海西極關河內安外穆華戎謐爾豈朕寡德所能  
獨致實賴相王父子左右皇家經綸夷嶮扶持國命四海百  
靈所共依仰文暢昆季狂勃如斯旣不利王且將危朕今不  
翦蕩後難方深永言念之震驚夢寐夫管蔡流言周誅肆於

前祀上官挺禍漢罰窮於昔年雖親在骨肉地居戚里未聞縱其要領全其苗裔若使在恩忘義存惠捨威則邦國淪覆翹足可待且國有正刑朝有常制君親無將事光先典捨而不行何以爲化宜肅舉刑書示於億兆文暢兄弟宜依律坐可令驃騎大將軍開府儀同三司尙書右僕射安德郡開國公祖裔速往行決母及妻子一依恆口其房子遠鄭仲禮李代林等頑嚚小醜謀此亂階身旣伏辜家有常例但侍中房謨執心端固操履清白出內在公績著朝野善人斯宥抑有舊聞仲禮本自傍孽晚見收舉身不列於伯季迹未入於家門一居晉陽內同行路代林生而外後事絕本親罪不相及義實有取相王棄瑕錄用志存含育既有啟聞事如高旨其

此三家依啟原恕並免其官誦罪私室自餘梟獍皆從律條  
文暢已下同逆之類義士棄其美榮資財豈汗王府所有家  
產悉賞軍人一任相王斟酌分給漆頭焚首歷代共之洿宮  
醢骨蓋帷通準天之所棄人其舍諸

後魏孝靜帝伐元神和等詔一首

魏收

門下向背有禍福之機誅賞爲威勸之本軌物成務威必由  
之侯景擢自凡猥名行無聞僥倖時來謬見收試狡僭反覆  
唯利是從往事爾朱偏受榮遇一朝去就罔顧昔恩趙趣輕  
動志在姦詐朝廷棄瑕藏穢仍蒙令引庶其鴟音可草取其  
行閒之用位踰其量過延寵祿藉我風雲遂成鱗羽入列鼎  
臣出裁節將勳無可紀才不足徵而淺器遽盈知小謀大謂

已功名難居物下曾不知狐假武威地憑霧積包藏禍心潛圖不軌因總戎之際乘專任之機擁逼兵眾構釁南服此乃懦夫扼腕之日義士切齒之秋凡在人倫孰不憤慨而前揚州刺史元神和何悅張慶壽王黑醜宮延和王貴顯侯仙劉崇信張業等九人並以賤蔑名汙朝簡了無犬馬之識便有梟獍之心密相影響贊成姦逆隨託豺狼長茲蛇虺欣其位署委質驅馳甘厥鉤餌效以死力東西殘掠毒被村隅扇合蛾蟻終此亂階叛恩背德莫此之甚雖蹈名義事非小人而申禁垂法國有恆典其此九家並可從憲孥戮之科理無攸捨自餘拘繫誑誤之徒既懼死俛眉情非樂禍宜疏天網一原不問固使逆節知滂薦之制傾側獲自安之所

宋順帝西討詔一首

門下豺虺反噬，釁阻西州。義士厲魂，懦夫聳氣。秋葉春冰，跋踵可殄。猶宜薄曜，六軍肅行。天誅驃騎，大將軍道成神。寓英邁，叡策深算，必能踐機。電掩乘利，雲驅便可。總統水陸，明發次路。實憑嘉謨，以清氛沴。

齊明帝北伐纂嚴詔一首

徐孝嗣

門下自晉氏中微，宋德將謝。潘臣外叛，要荒內侮。天未悔禍，左袵亂華。巢穴神州，遂淹年載。朕嗣膺景業，踵武前王。靜言隆替，思壹區夏。但多難甫夷，恩化肇洽。興師擾眾，非政所先用哉。遠圖權緩，北略冀戎。夷知義懷，我好音而凶酋剽狡。專事侵掠，驅扇異類。蟻聚西偏，乘彼自來之資，撫其天亡之會。



軍無再駕人不重勞傳檄以定三秦一麾而匡禹迹在斯舉  
矣且中原士庶久望皇威乞師請援結軌馳道信不可失時  
豈終朝宜分命方岳因茲大舉侍中太尉鄱陽郡開國公顯  
達當暫輟槐陰指授羣帥可使持節本官公如故便可中外  
纂嚴明設購賞

梁武帝北伐詔一首

沈約

門下朕膺天明命平壹區宇念在綏懷遠邇康俗濟人每敕  
邊備勿擾疆場自非時來有會因機電埽不得輕信間諜冒  
求小利兼欲制勝廟堂以德懷遠而比得徐豫諸州并郡守  
啟牒云叢爾獯醜陳兵淮甸蜂聚蟻結規犯邊城推之以事  
理不應爾但遺虜餘孽肆彼人上僞黨猜離爲日久羯將

元澄嫌隙內構作戎壽春常慮禍及故設此姦數規擾邊鄙  
望得推遷少延晷刻而蜂蠆有毒聞之自古兼以淮肥萌庶  
存本志深應赴之宜實在斯日便可命將出師乘機翦定今  
遣中領軍雲杜縣開國侯慶遠等濟自牛渚卷甲風驅徑趣  
長瀨寧朔將軍王僧炳等熊羆三萬步出橫塘左將軍珍國  
武旅五萬相係電發北向鍾離直出肥口冠軍將軍紹叔等  
餐兕四萬飛帆巢湖席卷合肥直指淮汭征南將軍茂先等  
水步六萬同出廬江風掃壽春反我侵地輔國將軍叡等浮  
舟清泗北取下邳雲徹颿舉吞蕩彭汴後軍將軍和海牒凌  
波逕出長廣營工舊國一麾以定左將軍景宇等總樊鄧銳  
師底定伊洛征虜將軍工黑勒華陽之眾斜趣長安緣邊收

守各據要害絕其歸逕勿使能反侍中穎達等出鎮瓜步枕  
威江涘西道衆軍並受茂成規北伐羣師悉稟秀戎律郢司  
雍自如先相督夫兵者凶器實難屢動廢人費財爲邦所戒  
便宜因此營一括囊禹迹先定充司進靡并涼文軌大同於  
是乎在

梁武帝又北伐詔一首

門下周文薄伐實寧邊患漢武命師允恢王略蕞爾犬羊陵  
縱日久宋氏云衰乘釁逞暴海岱彭鄒翦焉淪覆雖每存拯  
定雄圖弗舉齊末糾紛復肆姦毒宛葉淮肥仍離內侮僞酋  
惡稔天誅自降凶渠嗣虐險慝彌流殘鉏親黨咀噬黔庶繁  
役絲興毒賦雲起司冀餘華中州舊族綴足宛頸載離塗

炭延首南雲思沾王澤鼎運啟基大業草創蠢彼戎心仍窺  
疆場虔劉我部曲侵擾我徐方小豎道遷乘隙背誕凶醜貪愚  
復相苞納前以叛臣難長彼此齊患推心忖物庶必闔同故  
有移書較陳往旨而方加擁蔽曾無及報同惡相濟市賈非  
匹告舍旣違難以義獎非威非力制勝莫從加以醜數云亡  
幽顯咸應訛謠表微災沴備兆殄滅之期皎如日月左伊右  
瀍實殷霜露鴟梟是宅非謂天道一口已周實惟冥數取劑  
之機事協茲日頃時和歲稔政平人豫華戎內款表疏相屬  
便宜廣命羣帥赫然大舉總一車書混同禹迹具位泉猷等  
戎卒七萬先定壽春某等武旅五萬揚旌灝峴旣清潁汝臨  
瀍澗某等鐵騎二萬超影絕羣出自太徐旁趣鞏洛某等組

甲四萬霜鋒四日發自淮汭直指金墉某等率羽林趨勇五萬某等率二禿剽猛熊罷十萬同濟彭泗經汴入河某等海桐萬舫徑掩臨淄某等輕銳五萬風偃濟岱拂茲鉅野汎彼孟津某勒司郢之師驍勇六萬步出義陽橫轡熊耳某等率三州武毅劍客八萬入自曾陽傳檄峭陝暨中嶽而解鞍指浮橋而一息並敕某等連旌五萬水陸齊邁具位泉藻帥徒七萬雲飛靈關北通棧路澄廓隴右凡此將帥啟塗載路魚麗後軍駱驛繼軌經啟中原括囊九服伐罪弔人於是乎在大眾外臨宜有總一自非密親英譽風略兼遠無以專任闕外授律羣師臨川王宏可權進督南北充徐青冀豫司霍八州都督北討諸軍事命將出車咸有副貳具位恢可暫輟端右

參贊戎機舟徒雷駭熊武百萬投石拔距之力折關扛鼎之  
威岳動川移風馳電邁鐵馬方原戈船千里百道并驅同會  
洛邑戡翦逋醜馘埽鯨鯢被仁風於兩周撫遺黎於趙魏將  
令溥天之下於斯大同偃伯靈臺何遠之有元恪若能率某  
徒屬興櫬軍門者中軍府以時將送當待以列侯之禮

北齊文宣帝征長安詔一首

門下朕撫興運歷數在躬內綏外略志清四海是以沙塞之  
外虜馬無跡遼碣已東夷車共軌百蠻畏威三吳慕義天下  
九州克寧者八惟有秦隴蕞爾久隔風化僭擅一方狼顧鷄  
時詿誤良善迫脅忠賢置之凶網無由自拔君臨區宇萬物  
爲心言念關輔能不憤慨天旣厭亂人思大同混一之期事

在今日武夫百萬龍馬千群含怒蓄銳爭驅求敵何得爽神毗  
之心抑將相之請必當訓旅誓衆天動雲臨新途舊道長驅  
電擊賊帥宇文黑獺口拒一隅不討日久自許雄兒假稱假  
將深藏匿跡雖存若亡今干戈不戢輸運未止論人指事誰  
爲厲階不容弘茲度外居之漏網斧鉞所用捨此何先獺若  
敢率烏合送死東下或由舊洛或出太州當親統六軍決機  
兩陳朕遠尙軒后有戰必平近募成湯無征不克策略所用  
抑與神通小醜區區想所聞悉苟獲交兵天贊我也如其鼠  
竄秦中憑恃險阨擁兵自守不敢動足朕已下木汾流成船  
晉地便當躬先將士超河西入玉壁河東猶如棄土何用顧  
瞻眇小取茲枝葉當徑掩長安梟茲凶首雖復藏山沒水終

不縱置其所部將士足知禍福若翻然順疑立忠建效高官  
重實事異常倫如其同迷不反敢隨逆節軍鋒之下自有恆  
誅朕以梁邦舊敦好睦聞其姦計乃欲都謀荆郢之間望爲  
僥倖第七上黨王渙雄才猛力氣震三軍賊有耳目豈不委  
具當令其稔勒熊羆口流風卷直指寇場何往不碎王者之  
言明如日月終不示以虛聲而無實事宜申宣內外咸使聞  
知

北齊文宣帝西伐詔一首

陽休之

門下昔漢祚肇興番禺有竊號之長土德應運吳蜀有不韙  
之首自魏道陵夷四維板蕩關隴乘釁擅命一方狐棲鷁據  
假延歲序天網未加生靈塗炭朕握符受命臨御兆人九服



來蘇百蠻稽顙念彼關河獨隔王化不有蹙勞理無永逸今  
便親御六軍長驅三輔總七萃之雄奮五丁之銳問罪涓濱  
弔人隴右天下大定良在茲辰可以今月二十日出頓敕內  
外戒嚴尙書依式備辦

後周武帝伐北齊詔二首

制詔高氏因時放命據有汾漳擅假名器歷年永久朕以享  
毒爲心遵養時晦遂敦聘好務息黎元而彼懷惡不悛尋事  
侵軼背言負信竊邑藏姦往者軍下宜陽靈山彼始兵興汾  
曲事非我先此獲俘囚禮送相繼彼所拘執曾無一反加以  
淫刑妄逞毒賦繁興齊魯軫殄悴之哀幽并企來蘇之望旣  
禍盈惡稔叛親離不有一戎何以大定今白藏辰涼風

戒節厲兵詰暴時事惟宜朕當親御六師龔行天罰庶憑祖宗之靈資將士之力風驅九有電掃八紘可分命衆軍指期進發

制詔夫樹之以君司牧黔首蓋以除其苛慝恤其患害朕君臨萬國志清四海思濟一代之人寘之仁壽之域緬彼齊趙獨爲匪臣乃睠東顧載深長想僞主涼德早聞醜聲夙著酒色是耽盤遊是悅奄暨居阿衡之任胡人寄喉脣之重棟梁骨鯁翦爲仇讐狐趙緒餘降成阜隸人不見德唯虐是聞朕懷茲漏網置之度外止欲各靜封疆共紓人瘼故也爾之相曾莫是思欲構厲階反貽其梗我之率土咸聞

文館詞林卷第六百六十二

文館詞林卷第六百六十四

甲書李寶嘉修國史弘文館主柱國高陽郡開國公許敬宗等奉敕撰

漢文帝與匈奴和親詔一首

魏明帝答東阿王論邊事詔一首

後魏孝文帝與高句麗王雲詔一首

隋文帝頒下突厥稱臣詔一首

安邊詔二首

隋煬帝褒顯匈奴詔一首

武德年中鎮撫四夷詔一首

貞觀年中安撫嶺南詔一首

慰撫高昌文武詔一首

巡撫高昌詔一首

撫慰處月處密詔一首

撫慰百濟詔一首

撫慰新羅王詔一首

漢文帝與匈奴和親詔一首

制詔朕旣不明不能遠德使方外之國或不寧息夫四荒之外不安其生封圻之內勤勞不處二者之咎皆自朕之德薄而不能遠達也閒者累年匈奴並暴邊境多殺吏人邊臣兵吏又不能諭其內志以重吾不德夫久結難連兵中外國將何以自寧今朕夙興夜寐勤勞天下憂苦萬姓之惻怛不安永寧一日忘於心故遣使者冠蓋相望結轍於道以諭朕志

於單于今單于反古之道計社稷之安便萬姓之利新與朕俱棄細過偕之大道結兄弟之義以全天下元元之人和親以定始于今年

魏明帝答東阿王論邊事詔一首

制詔覽省來書至于再三朕以不德夙遭旻凶聖祖皇考復見孤棄武宣皇后復卽立宮重此哀榮五內傷剝又以眇身闇於從政是故二寇未誅黔首元元各不得所雖復兢兢坐而待旦尚懼無益王俠輔帝室朕深賴焉何乃謙卑自同三監知吳蜀未梟而海內虛耗爲憂又慮邊將或非其人諸所開喻朕敬聽之高謀良策思聞其次

後魏孝文帝與高句麗王雲詔一首

門下得黃龍表知卿愆悖朝旨遣從叔隨使夫儀乾統運必  
以德信爲先準列作藩亦資敬順爲本若君信一虧何以臨  
御萬國臣敬慙替豈能奉職宸居故霆震作威以明天罰五  
刑垂憲以肅不恭斯乃人神之常道幽顯之通規往以明堂  
肇制皇化惟新敕諸藩侯修展時見至於言獎羣方勸說荒  
服每以句麗虔誠喻厲要戎今西南諸國莫不祇奉大命星  
馳象魏或名王入謁或藩貳恭覲觀光駿奔欣仰朝祀皇皇  
之美於斯爲盛而卿獨乖宿款用違嚴敕前辭身痾後託子  
幼妄遣枝親仍留同氣此而可忍孰不可恕也若卿父子審  
如所許者應遣親弟以赴虔貢如令弟復沈瘵應以卿袒枿  
體代行過事二三並違朝命將何以固昔房風晚至大禹所

以垂成東國闕敬周公所以親駕斯豈急急於兩夫遄遄於  
兵甲者哉但以縱之則萬國同奢戮之則九宅齊肅故也從  
叔之朝乃西藩常事今於旅見之辰而同之歲時之使於卿  
之懷寧可安乎卿之親弟及卽鄒二人隨卿所遣必令及元  
正到闕若言老病者聽以四牡飛馳車與涉路須待卿親至  
此然後歸反羣后重爽今召令朕失信藩辟者尋當振旅東  
隅曜戎下土收海金賚華夏擁貉隸而給中國廣疆畿於滄  
濱豐饒使於甸服抑亦何傷乎其善思良圖勿貽後悔如能  
恭命電赴既往之稽一無所責恩渥之隆方在未已矣不有  
君子奚能爲國其與萌秀宗賢善參厥衷稱朕意焉

隋文帝頒下突厥稱臣詔一首



門下突厥沙鉢略可汗表如此背暴風不作故南越知歸  
雲千呂使西夷入貢遠人內向乃事關天獯鬻相踵抗衡上  
國止爲寇盜禮節無聞唯有呼韓永臣於漢奇才重出異代  
一揆沙鉢略稱雄漠北多歷歲年左極東胡之土右苞西域  
之地遐方部落皆所吞并百蠻之大莫過於此昔在北邊屢  
爲草竊朕常曉喻令必修改彼亦每遣行人恆自悔責今通  
表奏萬里歸風披露肝膽遣子入侍罄其區域相率稱藩往  
迫和與猶是一國今作君臣便成一體情深義厚朕甚嘉之  
蓋天地之心愛養百姓和氣普洽使其遷善屈膝稽顙畏威  
懷惠雖衣冠軌物未能頓行而稟訓承風方當從夏永爲臣  
妾以至太康荷天之休海外有截豈朕薄德所致此已敕有

司肅吉郊廟宜普頒行天下咸使知聞

隋文帝安邊詔二首

李德林

門下有陳氏昔在江表劫剝生靈事等怨讐何以堪命嶺南  
之地塗路懸遠如聞凶魍賊斂貪若豺狼賊署官人情均谿  
壑租調之外微責無已一丁年科甲一具皮毛鐵炭船乘人  
功殊方異物干端萬緒晨召暮行夕求旦集身充苦役至死  
不歸物有借公永不還主與人共市百倍求利詣官申屈一  
代無期各不聊生無能自保晝悲宵恨行號坐泣微畜資產  
殃禍立至誣以賊盜繫以囹圄貨財不盡性命不存彼土之  
人性多純直弗堪州郡漁獵之苦或避山藪規免旦夕卽輕  
反叛申於僞臺歲歲起兵西南征討多縛良善以充賊隸國

首方足同稟性靈故以上感立天有傷和氣南海諸國欲向金陵常爲官非法盤檢遠人嗟怨致絕往還陳氏云微厥途非一羶陳聞見其慈實甚今皇師宣揚朝化凡此諸事已爲百姓除之重加存恤之理別申愛養之義軍行所及一毫勿犯外國使人欲來京邑所有船舶沿汴江河任其載運有司不得搜檢額外土宇置州立縣既令擢彼人物隨便爲官省迎送之煩知風俗之事訓人導德正身率下必當悉改前弊以副朕懷

門下西南夷俗遠僻一隅昔在漢朝始經開拓山藪之內多或生梗頃年以來荒遐率服梯山航海無闕歲時而種類實繁競相殘賊重譯款邊奉藩屢請咸乞王師救其暴亂朕受

明命爲天下君一物失所載深矜惕懷柔止殺前王令典宜遣大使先喻朕懷仍命諸軍勒兵繼進若軒蓋所至望風投款善加綬養各令安業如或愚蔽敢相抗拒軍鋒所及止在逆者一身其餘家口並亦撫慰務在安全一豪勿犯不得肆將士之情極干戈之用遠方異俗其知此心

隋煬帝褒顯匈奴詔一首

門下德合天下覆載所以弗遺功格區宇聲教所以咸眾至於梯山航海請受正朔襲冠解辮同彼黔黎是故王會納貢義彰前冊呼韓入朝待以殊禮突厥意利珍豆啟人可汗志懷沈毅常修藩職往者挺身違難拔足歸仁先朝嘉此款誠授以徽號資其甲兵之眾牧其殘滅之餘復祀於旣亡之國

續資治通鑑長編卷之五  
五  
繼絕於不存之地斯固施均亭育澤漸要荒者矣朕以寡德  
祇奉靈命思播遠猷光熙令緒是以親巡朔野撫寧藩服啟  
人深執誠心入奉朝覲率其種落拜首軒墀言念丹款良以  
嘉尚宜隆榮數或復恆典可賜輅車乘馬鼓吹幡旗贊拜不  
名位在諸侯王上

武德年中鎮四夷詔一首

門下畫野分疆山川限其內外遐荒絕域刑政殊於函夏是  
以昔王御俗懷柔遠人義在羈縻無取臣屬渠搜卽敘表夏  
后之成功越裳重譯美周邦之長算至如秦皇好勝口逐戎  
夷漢武憑威交兵胡越遂使四萌暴骨九府無儲天下騷然  
海內愁怨有隋季代黷武耀兵萬乘疲於河源三年伐於遼

外構怨連禍力屈貨殫緣邊苦亭部之虞列郡勞烽燧之警  
棄義交惡深乖至仁朕祇膺寶圖撫臨四極悅近來遠思得  
安寧今既歷運初基追革前弊要荒藩服宜與和親其吐谷  
渾已修職貢高句驪遠送誠款契丹昧竭咸求內附因而鎮  
撫允合機宜分命行人就申好睦靜亂息眚於此乎在布告  
天下明知朕意

貞觀年中安撫嶺南詔一首

門下朕恭承明命臨馭區宇一人一物咸思乂安夕惕晨興  
無忘寢食嶺表遐曠山洞幽深雖聲教久行而風俗未一廣  
州管內爲弊尤甚蠻夷草竊遞相侵掠强多陵弱眾或暴寡  
又在官之徒多犯憲法刑罰淫濫貨賄公行吏有懷姦人未

見德永言政術憂歎無忘宜命韜軒安撫荒服可遣員外散騎常侍韋叔諧員外散騎侍郎李公淹持節往廣州高州崖州都督管內充使巡省其檢校法式並宜依前敕事條

貞觀年中慰撫高昌文武詔一首

門下朕受天之命君臨四海地無遠近人靡華夷咸加撫育使得安靜是以八方之內所有諸國並受朝化效其忠款唯爾故高昌王麴文泰獨懷異心頓虧臣節拒違朕命罪釁不少酷虐爾等苛暴非一賞罰無章賦斂繁重妄造輿服多營樓觀兼西藩往來行旅皆被擁塞道路中國流寓之人悉遭非理重役旣興嗟怨俱不聊生朕猶懷哀矜未忍問罪頻經遣使具有璽書殷勤示導前後相續而文泰凶暴轉甚曾

不改悔乃更深掘濠塹高其城雉復令爾等遭此苦役所有生業因此並廢朕在朝文武及於諸藩咸有表聞固請展效朕所以遂遣兵馬往申弔伐但爲罪惡者止是文泰一人天所不容已自喪殞又聞其子還襲僞位知近歸首雖由事急朕子育萬方有懷哀愍今特免罪存其性命爾等並舊是中國之人因晉亂陷彼雖居夷俗仍習禮義且文泰歷代爲彼君長爾等久相服事是其臣下旣彼任使並受驅率初雖抗拒當非本心朕撫有天下唯行賞罰欲使人人懲勸皆知向善其有邪佞之徒勸文泰爲惡損害彼者卽令與罪以謝百姓自外一無所問咸許自新其有守忠直之節諫爭文泰及才用可稱者當今收敘使無屈滯今卽於彼置立州縣管領



爾等宜各竭其誠節稟受朝風朕爲人父母無隔新舊但能  
願守忠款勤行禮法必使爾等永得安寧爾等與中國隔絕  
以來多歷年所今逢清定理願盡心其僞王以下及官人頭  
首等朕並欲親與相見已命行軍發遣人諒宜相示語皆令  
知委勤事生業勿懷憂懼也秋序稍冷想比無恙家門大小  
常並平安故遣守左衛郎將駙馬都尉黃國公寶奉節指申  
往意

貞觀年中巡撫高昌詔一首

門下高昌之地雖居塞表編戶之屯咸出中國自因隔絕多  
歷年所朕往歲出師應時克定所以置立州縣同之諸夏而  
彼士黎庶具識朕心並變夷俗服習王化家慕禮讓之風人

事農桑之業朕愛養蒼生無隔新舊引領西顧嘉歎良深宜遣五品一人馳驛往西州宣揚朝旨慰勞百姓其僧尼等亦宜撫慰高昌舊官人并首望等有景行導直及爲鄉閭所服者使人宜共守安西都護喬師望景擬騎都尉以下官奏聞庶其安堵本鄉咸知爲善彼州所有官田並分給舊官人首望及百姓等自大軍平定以後有良賊被配沒及移入內地之徒逃亡在彼及藏隱未出者並特免罪卽任於彼依舊附貫使人仍巡問百姓有病患者量給醫藥老病憫獨糧食交絕者亦量加振給朕比選補州縣官人每加簡擢或恐至彼未能盡稱朝寄若有貪殘爲百姓之患者使人明加訪采并改道有不便於百姓亦宜詢問還日並具以聞

貞觀年中撫慰處月處密詔一首

門下西域之地經途遐阻自遭亂離三歷歲月君長失撫馭  
之方酋帥乖叶贊之義虐用種落肆行殘忍遂使部眾離心  
戰爭不息遠近塗炭長幼怨嗟大監小王無所控告頓顙蹶  
角思見含養朕受命三靈君臨六合御朽之志無忘寢興納  
隍之懷寧隔夷夏迺瞻西顧良深矜惕宜命輜軒星言拯救  
可令左屯衛將軍阿史那忠爲西州道撫慰使屯衛將軍蘇  
濃泥孰仍兼爲吐屯檢校處月處密部落宣布威恩招納降  
附問其疾苦濟其危厄務盡綏懷之道稱朕意焉

貞觀年中撫慰百濟王詔一首

皇帝問柱國帶方郡王百濟王扶餘義慈朕祇膺靈睠君臨

區宇憂勤四海憐養萬姓天地之所覆載日月之所照臨咸  
被愷澤致之仁壽王嗣守藩緒累效迺心早慕禮樂之風久  
習詩書之教虔修貢職汎彼滄波行李相繼於道路賅費不  
絕於王府言念丹款朕甚嘉之故高麗王高武早奉朝化備  
展誠節朝貢無虧藩禮尤著其臣莫離支蓋蘇文苞藏姦凶  
奄行弑逆寃酷結於遐裔痛悼聞於中夏朕受命上玄爲其  
父母旣聞此事甚用愍傷若不申茲九伐無以懲肅八表今  
先遣大總管特進太子詹事英國公李勣董率士馬直指遼  
東大總管刑部尙書郎國公張亮總統舟艦徑臨平壤朕仍  
親巡遼碣撫彼黎庶誅其凶逆布以威恩當使三韓之域五  
郡之境因此蕩定永得晏然前得新羅表稱王與高麗每興

士眾不遵朝旨同侵新羅朕便疑王必與高麗協契覽王今表及問康信王與高麗不爲阿黨旣能如此良副所望康信又述王意固請發兵卽與官軍同伐凶惡朕今興動甲兵本誅殺君之賊王志存忠正情切鷹鷂旣稱朕懷欽歎無已所發之兵宜受張亮處分若討賊之日能立功勳王宜錄奏當加褒獎然王盡心國家無所愛惜遠獻子女深具丹誠朕旣有事遼左方弘弔伐若卽不違來請受王所獻便恐四海之議謂朕有所貪求其女今且令還賊平之後任王更奏宜知此意勿致怪也所奏學問僧等請聽恣意出入及三藩使人等級者知又請蔣元昌往彼爲王療患者元昌朕先使往益州道今猶未還所以未得令向王處所請僧智照還國者已

依所奏宜知今令朝散大夫莊元表副使右衛勳衛振師段  
智君等往新羅王所宜速遣人船將送必令安達勿使在道  
被莫離支等鈔截也首春猶寒想比無恙國境之內當並平  
履新之慶與王及率士同之康信今還指申往意并寄王物  
如別

貞觀年中撫慰新羅王詔一首

皇帝問柱國樂浪郡王新羅王金善德朕祇膺靈命君臨區  
宇矜惕之懷無忘於夙夜撫育之志寧隔於遐爾萬方有罪  
情深納隍一物失所坐以待旦高麗恃其險阻肆行凶慝數  
動干戈侵王境界朕愍王在遠遭其充斥頻命行人示其利  
害而凶愚之性莫肯悛革故違朕命曾不休兵加以莫離支

蓋蘇文苞藏禍心乃殺害徧於忠良凶虐被其土境逆亂既甚罪釁難容朕是以大發師徒往申弔伐拯彼國之危急濟遼左之塗炭剋定之期在於旦夕去年王使人金多遂還日具有璽書以水軍方欲進路令王遣大達官將領人船來相迎引訝王比來絕無消息爲是被高麗斷截爲是不遣使來引領東顧每勞虛想前本欲令禮部尙書江夏郡王道宗總統水軍今道宗別有任使仍先令光祿大夫刑部尙書張亮總統舟艦又令特進太子詹事英國公李勣亦爲大總管董率士馬並水陸俱進直指賊庭計四月上旬之內當入高麗之境若同惡相濟敢拒王師便肆軍威俾無遺類王與高麗怨隙旣重所部之兵想裝束久辦宜與左驍衛長史任義方

相知早令纂集應行兵馬並宜受張亮等處分朕仍令行軍  
總管守右驍衛將軍東平郡開國公程名振等爲張亮前軍  
并遣朝散大夫莊元表副使右衛勳衛旅帥段智君等使往  
彼國元表等至日王卽宜遣到亮等軍所共爲期會仍須遣  
使速來奏朕今六合之師百道俱進或鐵騎如雲越襄平而  
電擊或戈船連軸汎滄波而風掃華夷響會遠近戮力以此  
破陣何陣不摧以此攻城何城不剋朕卽以今月十二日發  
洛陽至幽州便當東巡遼左觀省風俗親問疾苦戮渠魁之  
多罪解黎庶之倒懸被以朝恩播茲愷澤當令三韓吏人五  
郡士庶永息風塵之警長保止山之安王早著迺誠每盡藩  
禮干戈所臨爲王除害忻悅之情固當何已所遣之兵宜簡



精銳破賊之日若能立功具錄聞奏當加褒獎春序稍暖想  
比無恙境局之內當並平安自外並元表所具并寄王信物  
如別

文館詞林卷第六百六十四

校書殿寫弘仁十四年

歲次癸卯爲冷然院書

文館詞林卷第六百六十五 詔三十五 赦宥一

中書令太子賓客監脩國史弘文館學士上柱國高陽郡開國公臣許敬宗等奉 敕撰

後漢章帝郊廟大赦詔一首

東晉成帝郊祀大赦詔一首

後魏孝文帝祭園丘大赦詔一首

宋文帝南郊大赦詔一首

親祠廟大赦詔一首

南齊武帝郊祀大赦詔一首

饗祭大赦詔一首

殷祭恩降詔一首

梁武帝新移南郊親祠赦詔一首

南郊恩降詔一首

南郊恩詔一首

冬至郊禋赦詔一首

禋饗恩降詔二首

北齊孝昭帝郊祀恩降詔一首

宋文帝拜陵赦詔二首

貞觀年中拜謚山陵赦詔一首

西晉武帝藉田大赦詔一首

宋文帝藉田大赦詔一首

宋孝武帝躬耕千畝大赦詔一首

藉田大赦詔一首

南齊武帝藉田恩詔一首

梁武帝藉田恩詔二首

藉田勸農大赦詔一首

宋孝武帝明堂成大赦詔一首

後魏孝文帝遷都洛陽大赦詔一首

隋煬帝營東都大赦詔一首

後漢章帝郊廟大赦詔一首

制詔朕巡狩岱宗柴望山川告祠明堂以彰先勳其二王之  
後先聖之胤東后藩衛伯父伯兄仲叔季弟幼子幼孫百僚  
從臣宗室眾子要荒四裔沙漠之北蔥嶺之西冒彫之類跋  
涉懸度陵踐阻絕駿奔郊時咸來助祭祖宗功德延及朕躬

予一人空虛多疚纂承尊明盥洗享薦慙愧慄慄詩不云乎  
君子如祉亂庶遄已歷數旣從靈曜著文亦欲與士大夫同  
心自新大赦天下

東晉成帝郊祀大赦詔一首

制詔仰憑先訓傍賴宰輔雖自勛勵恆惕于心有司脩典虔  
奉郊祠燔柴旣饗芳氣清穆誠君子勤禮忙力普存祖宗神  
靈天地歆類奚獨朕躬荷斯休佑思與兆庶共同斯慶其大  
赦天下咸得自新

後魏孝文帝祭圜丘大赦詔一首

門下飛宿澄天表懸象之光列嶽崇地著神區之寶故微辰  
闔中島玄圖敞展嵩室鎮極赤縣彬分耀昊凝紫以保生鎮

宰紳黃而首唱茗茗予靈功之在茲洪化之所由矣今元軒  
季洛聖歷鏡釐日月凝光寒暑交尉冥化與陰陽齊和人風  
隨天地俱合曰止日時律唯黃鍾萌春潛陟軋正微顯禘天  
圓頂爰祖地正百神受職千靈昭享皇依安而下顧萌繇繆  
以仰祐幽明忽恍神人雜沓者哉朕德匪上皇道慙中叅謬  
鍾之鼎運臻升中一昨奉祀暫登太儀徒步雲下振玉風嶺  
望闔闔而聳氣扳辰階以娛衿弗知何德可以爾乎思與兆  
獻共斯嘉祐且天元之後萬務方新宜開大始彰厥猷端可  
大赦天下與人肇旦諸謀反大逆外叛煞人殊死以下已發  
覺未發覺繫囚禁錮至太和□年□月□日長至昧爽已前  
一皆原除逋負租調官物違限者自此年正月以前悉聽了

有司詳准舊式備爲條格既與萬邑俱創風澤宜各濯心日新厥政咸相申告稱朕意焉

宋文帝南郊大赦詔一首

門下朕丕承基緒撫御九服不能弘風導人脩德柔遠刑辟猶殷文軌未一納隍之愧無忘日夜加抱疴彌祀四時曠禮眷言永懷良疚于心今履端郊禋大典允備誠敬旣遂幽顯同洽思播休慶宜被率土可大赦天下文武賜位一等孤老大疾不能自存者人穀五斛

宋文帝親祠廟大赦詔一首

門下夫盛王宰俗因時成務易簡以育物寬恕以惠下執古御今不易之道矣朕以寡昧臨饗萬國思遵洪軌化濟黎蒸

而政教弗弘獄犴尙積鑿寐惟愧實疚于心加久患在躬不堪拜伏曠違禘嘗忽已累載始獲虔奉慶感兼深思播仁澤洽被率土其大赦天下楊難當父子不在赦例

南齊武帝郊祀大赦詔一首

王儉

門下夫惟刑之恤哲王所以弘化雷雨作解天地所以垂仁況乃澤教凌遲罔訟彌積因心在宥寤寐載懷今禮暢郊禋情申嚴饗思俾靈和覃茲兆庶九惠與陽景齊暉四輿與條風俱穆不亦休哉可大赦天下京畿政本威令所由人之多僻特宜懲戒郊邑三百里內罪應入重者止降一等餘依赦制赦繫之身優量散遣

南齊武帝饗祭大赦詔一首

王儉



門下夫刑罰不足以移風殺戮不足以禁姦三辟之興皆叔  
葉也朕髡旒恭默志敷教義弘五禮於湯館詳六典於宣室  
者多歷年所而勝殘未聞囹圄犴猶積向隅之念每以懷懷今  
開春發歲肅祇郊饗情敬兼展事與時和思俾元元覃茲嘉  
惠可大赦天下

南齊武帝殷祭恩降詔一首

王儉

門下夫簡則易從聖賢所以成務刑清眾服人君所以順動  
朕臨馭八紘思弘七教而德微化淺囹圄未虛靜言前烈每  
懷愧歎今祇奉殷禘感敬兼申宜播休風覃茲繫囚見徒四  
歲刑以下可悉原遣五年刑減爲三歲京邑罪身應入重者  
並降一等

梁武帝新移南郊親祠赦詔一首

徐勉

門下朕仰則洪規欽若祀典因高嚴事禮度惟新乘茲上吉  
克展禋敬三燭與陽景同招六變將和風其遠豈予一人獨  
膺斯慶思俾元元咸陶嘉祉凡天下罪無輕重未發覺及已  
發覺未結正者在今味爽以前皆赦除之已結正者量降所  
原長徒鎖士有鵠老癯殘不能爲物患者悉聽放散經諸窮  
疾咸加卹振并班下四方時理獄訟勿使冤滯

梁武帝南郊恩降詔一首

門下夫雷雨作解上天所以流惠施舍已責哲后所以垂仁  
朕褻展君臨茲焉一紀雖菲躬思政而澤被未洽瞻彼三英  
興言多愧今上辛在日昭事禮申庶因陽和廣覃沐澤凡罪

自大辟以下在今昧爽以前未發覺未結正者凡諸逋負在十二年正月一日以前督未入者凡殘三調在十一年正月一日以前在人閒者皆赦除之鎖士未配營居者改爲卅年徒其長徒并刑讞已結正者量所優降唯主守割盜非過風水及市公見物贖市折市不在原例主者詳爲條格施行

梁武帝南郊恩詔一首

徐勉

門下春司御氣虔恭報祀陶匏克誠蒼璧禮備感時載懷望  
煙興念思隨乾履德布茲亭育凡人單老孤幼不能自存立  
者郡縣咸加收養贍給衣食每令周足以終其身又於京師  
置孤獨園使華髮不置孩幼有歸若終年命厚加料理少者  
長大令得匹偶又復尤窮之家勿收租賦

梁武帝冬至郊禋赦詔一首

徐勉

門下朕臨馭兆人懷乎十載眷言思化若涉大川氣象昭回  
長至在律煙燎克展誠敬載申思俾黎元預陶和慶天下罪  
無輕重未發覺及已發覺未擒并結正餘口繼討者在今以  
前皆赦除之繫囚見徒非預權制量所原散禁錮之身並加  
宥釋凡所討叛及乃藉隱年闔丁匿口浮遊他界悉開恩百  
日各聽自首不問往罪居局理事賜勞二年主者詳爲條格  
施行

梁武帝禋饗恩降詔二首

沈約

門下卜日禋饗政道莫先厚下布澤哲王是務朕仰祇靈眷  
俯臨億兆歲象週環恭事云及牲玉必薦感敬備申升煙燎

於穹昊致精誠於太一恩沾凱潤惠茲窮甯天監三年內外  
犯奪勞及左降可悉原除絳市職不充人身及家口質繫悉  
散還私於家督備前歲三五犯謫目及隨曹景宗援司州委  
叛應謫役者並量所蠲降尙書所檢巧陳注普更開恩百日  
各聽自首不問往罪京師二縣尤窮乏人詳加振卹主者速  
爲條格施行

門下朕肅膺乾貺君臨率土雖日晏劬勞而仁恕未洽星珥  
驟廻履端告始禋饗云備誠敬兼申宣和布澤情深待以凡  
內外文武可各賜勞一年叛亡未擒若百日内自首還役不  
問往罪女子質繫悉且散遣文書輕重坐罪並皆從原主者  
詳爲條格疾速施行

北齊孝昭帝郊祀恩降詔一首

魏收

門下朕以虛寡歷數在躬君臨四海惟寅寤寐晉陽都會王業斯在軍國經綸一日萬機出清朔土事兼巡路歲終時隙六龍南上朝野士庶延首翠旗瞻望京師有豫懷抱三元肇正萬國綯趨玉帛在廷華戎協契乃心自衷率由前典三垓八陞駢牲蒼璧聖考作配尊極祗禮致敬羣祖合食太宮言孝思誠禮交暢欽若舊章大事咸展日月光華風煙灑散蒼蒼在上雖曰不言天人允臧其意可想獲承宗廟念諸靈物俯育黎獻思納仁壽今中外禔福遐邇無塵豈其不德所能致此實由二儀眷顧三后降臨腹心爪牙宣力王室乘此而往期於太康南面垂拱有深欣慰天德在生三陽調序順

時流施疏網弘仁務茲造育爲義蓋遠用法申恩用蕩瑕穢其諸犯死罪降至流流罪降至五歲刑已下悉從原免

宋文帝拜謁山陵赦詔二首

門下先帝道合二儀功濟四海膺期撫運大造區夏仁孚顯化覃無外而猶哀矜鰥寡簡卹庶獄羣生懷惠率土仰德遺愛明訓永光萬葉朕以菲薄之姿承祖宗之重自奉禘嘗十載于茲夙夜敬念若涉深水仰憑聖猷用免顛墜日月驚過山陵緬邈肇歲瞻拜感慕彌遠思述餘澤少申罔極其赦天下

門下朕自違北京已廿餘年雖云密邇瞻塗莫從今因四表無塵時和歲稔復獲拜奉舊營展罔極之恩饗讌老故申追

遠之懷固已義兼於桑梓情加於還沛永言慷慨感慰實深  
宜事宣仁惠覃被率土其大赦天下行所經縣蠲田租之半  
老病單弱普加贍卹

貞觀年中拜謁山陵赦詔一首

門下朕嗣膺寶命光宅天下懷乎馭朽坐以待旦于茲十三  
載矣憑宗廟之靈資文武之助域中大定海外有截三元告  
始萬國來庭遂獲躬率庶僚奉謁陵寢罔極之哀慙申於瞻  
拜如在之敬克展於薦享永言風樹情禮兼申此旣園塋所  
在宜特布惠澤可曲赦三原縣并從行人貞觀十三年正月  
一日以前大辟罪以下咸赦除之已發覺未發覺已結正未  
結正皆赦除之其犯十惡繁人劫賊傷人謀繁人已傷官人



枉法受財監臨主守自盜盜所監臨並不在赦例三原縣人  
宜免今年租調老人年百歲以上各賜物廿段粟廿石藍被  
一具袍一領羊二口酒五斗九十一以上各物七段粟七石  
羊一口酒二斗八十以上各物五段粟五石孝子順孫義夫  
節婦各物五段粟五石鰥寡惇獨不能自存及篤疾各粟三  
石行所經縣及萬年縣京城以東以北老人并孝子順孫義  
夫節婦鰥寡惇獨不能自存篤疾並賜物及粟仍准三原縣  
三分減一百歲以上不在減限兼右監門中郎將延陵縣開  
國男齊士員宿衛已久既有勤勞可加官一階爵一級物一  
百段其陵令丞各加官一階賜物卅段陵戶賜物二段粟二  
石其有挾藏軍器亡命山澤百日不首復罪如初

西晉武帝藉田大赦詔一首

制詔古者象刑而人不犯垂衣裳而天下化及醇朴既散上失其道雖制參夷辟而姦宄不勝何德刑得失相去之遠歟承百王之弊宜道之以德使人興行而繁刑密網以羅百姓之命望庶類時和品物得所不亦難乎先帝深愍黎元哀矜庶獄乃命羣后考正典刑朕守遺業託于億兆之上永惟保乂鴻基在予一人思與萬國以無爲爲先方今陽春養物東作始興親帥王公卿士耕藉千畝以勸農功又律令旣就班之天下將以簡法務本惠育四海宜寬見罪使得自新其大赦天下

宋文帝藉田大赦詔一首

門下朕承統萬方已將二紀雖德禮未充政道多昧然矜在  
災瘼無怠于懷豈伊仁壽之域靡知所濟至乃淫亢在歲飢  
阻傷人永念前徽其魄已遠故載耒郊原躬耕帝藉上祇宗  
祧下率寮庶舊典聿脩誠敬兼敘思與億兆洽茲寬惠其大  
赦天下尤弊之處遣使振卹凡欲附農而種餉匱乏者並加  
給貸務令優允稱朕意焉

宋孝武帝躬耕千畝大赦詔一首

門下歲慶聿新櫛燎肅展耕實務本教以富立朕式應協風  
躬藉三推仰供粢盛俯訓億兆困庾克衍人和禮順天地並  
貺神祇罔愛肅慎楮矢浮溟來獻西極珍騏涉沙入貢三茅  
曜寶五靈炳祥維德不明震乎瑞物思答乾錫下敷農穡可

大赦天下逋租宿債一皆原除

曹田大赦詔一首

門下朕奉承宗祧嗣守鴻業夙夜寅畏思隆丕緒未能光宣  
先德式揚風教惠政弗孚矢言靡訓庶徵愆度邊患屢興念  
深納隍每懷明發故躬親帝藉敬供務本芟夷不端拯雪人  
瘼頃羣方効捷要荒草面時和歲稔禎祥仍集嘉稷玄黍頻  
秀京畿含稗祕苑擢穗千畝潔齊神倉薦饗郊廟三才協靈  
幽顯偕順永惟休佑何以臻茲自天降康豈伊在予思覃斯  
慶施于萬邦可大赦天下文武賜位一等長繫宜有降宥諸  
逋負合寬減者並詳爲條格孤老六疾不能自存人鬻穀五  
斛蠲建康秣陵二縣今年田租之半藉田華林園蠲係悉歸

暈賜之

南齊武帝藉田恩詔一首

王儉

門下耕藉所以表敬親載所以率人朕景行前規躬執耒耜千畝咸事六仍可期教義克宣誠感兼暢重以天符靈貺歲月麟萃寶鼎開玉匣之祥嘉禾發同穗之穎甘靈凝暉於坰牧神爵鸞翥於蘭囿斯乃宗稷之慶豈寡薄所臻思俾休和覃茲黔阜見刑罪殊死以下悉原宥諸逋負在三年以前尤窮弊者一皆蠲除孝悌力田詳授爵位孤老貧窮賜穀十石凡欲附農而糧種闕乏者並加給貸務在優厚

梁武帝藉田恩詔二首

徐勉

門下夫耕藉之義大矣哉桑盛由之而絜禮節因之以著古

先哲王咸用此作朕眷言八政躬事千畝公卿百辟恪恭其儀毗力普存馨香靡替兼以風雲叶律氣象光華屬覽休辰思弘獎勸可班下遠近廣闢良疇公田私畝務盡地利若欲附農而蠶種有乏並加貸給每使優徧孝悌力田賜爵一級預耕之司剋日勞酒

門下古之爲國也人足家給因時制用雖有淫亢人無菜色朕剋己思化弗敢怠荒而政道未凝仁風多愆或四氣暫乖則九年未積永言禮節取愧弘深今農祥晨正躬執耒耜三推旣展百工咸事上申誠敬下勸黎元有懷時澤以及率土凡逋租在十二年正月一日以前悉皆原除孝悌力田賜爵一級罪入刑讞追捕未擒並勿復討使附農業若欲肆力而

乏種糧普加貸給務令周事其預耕者并可勞酒

梁武帝藉田勸農大赦詔一首

門下敬授人時議高前典日中星鳥平秩東作朕率先公卿躬執耒耜上供粢盛下訓黔黎式懷古昔茂斯博愛川澤不竭山林不焚祀輟犧牲薦用珪璧皆所以乘和布政因時育物者也今三推禮畢九穀方碩庶百室盈止萬箱遺滯俶茲農慶宜弘寬澤凡天下罪無輕重未發覺已發覺在今年二月十日昧爽以前一皆赦宥

宋孝武帝明堂成大赦詔一首

門下朕采圖殷夏巡詩姬漢式清都左繕禮國陽神祇薦心與羣悉力役弗崇朝功疑仙造今歲獻元辰史正首吉朕昭

事上帝展敬先靈日麗有文鴻典斯昭仰瞻萌威徘徊罔極  
樂俾嘉慶洽茲億兆可大赦天下

後魏孝文帝遷都洛陽大赦詔一首

門下夫乾經崇昊必體元而滌清川緯凝至亦得一以協寧  
故璇璣考中寶魄無偏衡之耀黃嵩定極惟嶽罔仄壤之鎮  
況乃皇王統歷而得乖其寓正者哉峭函帝皇之宅河洛王  
者之區縣聖同其高風累叡齊其昌化是以唐虞至德豈離  
嶽內之京夏殷明茂寧捨河側之邑逮有周承荷道光前載  
姬父贊政量極八方微顯闡幽昭章天地之情窮理盡性褒  
博萬類之表故負斧七齡政平人睦遂因明辟之秋卜以無  
疆之兆仰辰紫以楷京俯靈影而樹元神龜呈祥食維漢洛



固天地之所合陰陽之所和萬物阜安乃建王國是用來紹  
上帝於土中光宅大邑時配皇天祚永歷年化郁二代及火  
運再輝金土繼德寶茲大室莫墜洪烈自書契已來豈有九  
隕之外入埏之際而位首席邦道冠百王者哉惟我大魏萌  
資胤於帝軒縣命創於幽都生人厥初實均稷稟宣帝南遷  
憩軫沮洳事同公劉業茲邢邑神元北徙遊止長川豈異宣  
甫至于岐下暨昭成建國漸堵盛樂何異周文作邑乎豐烈  
祖道武皇帝稟三才之秀質協五行之懋氣雄略冠於人綱  
英聲格於天紀飛神隕於大冥廓清馱于燕趙開誕龍功丕  
新五績雖號鴻魏襲猶寒澤諒以南黔未純北黎難諷且都  
玄代慚暢聲教頗等姬武宅是鎬京豈謂譬辰眾星永共耶

土非沃壤之區甸垂三千之域虞夏之所棄絕殷周之所莫  
顧得之不足以居眾有之不足以廣曠地非物象之所生氣  
靡中和之所致處堦人勞在陰志慘故令禮讓弗興虞芮  
競皇始之初冠裳偏陳愧慙森列制同襲則未盈紀歷尋復  
頽替業以戎馬化未文典皇居既然八荒奚式豈三祖之匪  
德寧二宗之弗叙抑亦土氣使之然五方之俗不可革故也  
遂使龍章闕于宇極六典湮于司牒有國百年經綸仍缺必  
代屢臻後仁罔暨是用寤寐惟寅未明九逝思光考烈之遺  
業載隆太平之懋化自非擇壤裁邑潛協五常將何以楷茲  
長範昏明靡易比雖述稽先誥彝秩憲章冠帶八齡毗未移  
風幾將九載禮化莫儂志不恬儒意多躁越畏威從制幸而

荀免三考無成皓齒奚益上慙代天之命下愧歷山之英是以因承平之休會藉立政之嘉運思滌蒼波一澄海嶽順天龍遊電遊南離蕩逆柔毗事貫幽顯然後欲卜還中京垂美無窮及五旆啟行九常首路賊帥殞躬蕭元淪沒乘弊繫喪大士曷爲含仁履義君子寧忘是以紆震收戈肅然懷軍息建赫於夏景寢肅肅於秋駕乃考鑒上下之徵觀九地之祐唯以嵩中爲最圓應天授汴洛背河左旋右迴諒帝宅之膏區誠百域之盛觀京邑翼翼四方之極其斯之謂歟已命元弟驃騎大將軍咸陽王禧等經構皇居定都洛邑遠遊盤庚之謨近軌若日之文改營周爲成魏移北師於南夏使褒華不墮儀於玄冥朱紉獲斯皇於上京脩文德以懷遠洽禮

訓以輝化休牛桃林韜鍬司府令子衿無悠心之思耆耄有  
庠序之遊考風日廣慈德月盈然後鳴璫岱宗和鑾衡會邁  
三五而不追蹈八九之遙迹化隆俗美功成業定使勛華之  
耀依然還光成康之頌鑠焉再詠豈不穆乎今故班詔萬方  
告遷率壤可謂有代雖故魏德實新豈惟四海濯心含生幸  
賴斯亦天地含慶幽明等液思與億兆同茲元吉其大赦天  
下與人更始自殊死已降謀反大逆背叛逃竄已發覺未發  
覺及繫囚見徒元罰禁錮在今十七年十月十八日昧爽以  
前皆原除之 庚

隋煬帝營東都成大赦詔一首

門下天生烝人樹之元首所以亭毒品物愛育黎元弘風長

俗其歸一揆朕嗣承鴻業丕膺歷命負四海之憂當萬方之  
責每以化風猶鬱政道未行何嘗不夕惕競懷納隍興慮於  
是憲章前聖聿循先旨以爲關河險固根本所屬伊洛形勝  
宜爲邑都故營建東京鎮攝諸夏地得陰陽之和土居天地  
之正審曲面狀瞻星揆日子來咸會棟宇稍成爰以吉辰入  
處新邑庶貢賦路均勞役云等東西巡撫朝覲惟宜然宮室  
創建事業伊始方享天休俱承永會宜覃惠澤咸與惟新可  
大赦天下自大業二年四月廿五日昧爽以前大辟罪以下  
已發覺未發覺及繫囚見徒悉皆原免其流徙邊方已達前  
所亦宜放還人惟□□在矜恤天下黎元宜免一年租調  
人誰無過所貴能改赦書以前亡官失爵者必行能可稱宜

量才收敘官人犯罪已從科斷更令戍役情有矜自今以後  
宜□罰防及劫賊之□□□□家□遠配亦宜停遣晉陽  
逆□□坐者多棄瑕錄用實惟朝典□在逆地爲緣坐解任  
者亦量□用內外羣官俱當朝委但能□□化人使知禮節  
則獄訟自□□平可期常赦所□□□□限若挾藏軍  
器□□□□日不首復罪如初敢以赦前事相告言者以  
其罪罪之

文館詞林卷第六百六十五

儀鳳二年五月十日書手呂神福寫

文館詞林卷第六十六 詔令三十六 赦宥二

中書令太子賓客監修國史弘農學士桂國尚陽郡開國公許敬宗等奉 敕撰

西晉武帝立皇后大赦詔一首

東晉成帝立皇后大赦詔一首

東晉穆帝立皇后大赦詔一首

東晉孝武帝立皇后大赦詔一首

後魏孝靖帝納皇后大赦詔一首

東晉明帝立皇太子大赦詔一首

東晉孝武帝立皇太子大赦詔一首

後魏孝靜帝立皇太子大赦詔一首

宋孝武帝立皇太子大赦詔一首



梁武帝立皇太子太赦詔一首

重立皇太子赦詔一首

立太子恩賚詔一首

後周武帝立皇太子太赦詔一首

貞觀年中立皇太子大赦詔一首

後周明帝誕皇太子恩降詔一首

後魏孝莊帝誕皇子大赦詔一首

梁武帝誕皇子恩降詔一首

東晉元帝誕皇孫大赦詔一首

後魏孝文帝誕皇孫大赦詔一首

貞觀年中誕皇孫恩降詔一首

東晉成帝加元服改元大赦詔一首

梁武帝皇太子冠赦詔一首

東晉孝武帝皇太子納妃班賜詔一首

梁武帝皇太子婚降大辟以下罪詔一首

宋孝武帝講武原降詔一首

春蒐大赦詔一首

宋孝武帝巡幸歷陽郡大赦詔一首

巡幸曲赦南徐州詔一首

南齊武帝幸青溪宮恩降詔一首

北齊後主幸大明宮大赦詔一首

陳後主幸長干寺大赦詔一首

隋文帝拜東岳大赦詔一首

隋煬帝巡幸北岳大赦詔一首

幸江都赦江淮以南詔一首

武德年中幸通義宮曲赦京城內詔一首

貞觀年中幸國學曲恩詔一首

幸魏王泰宅曲赦詔一首

西晉武帝立皇后大赦詔一首

制詔朕聞王者所與虔承祖宗敬供粢盛刑于閭閻以儀刑萬邦者必須內主是以選建長秋正位中饋庶隆化本嘉與百姓日新其政其大赦天下

東晉成帝立皇后大赦詔一首

制詔傳云正家而天下化蓋美后妃之義也是以周文稱有  
亂之盛大雅詠徽音之章朕以眇身弘濟艱難賴祖宗之重  
宰輔元勳羣公卿士之力今長秋旣建虔告宗廟正位中饋  
以奉粢盛軌物六宮剋諧內典將與四海咸同斯慶加頃者  
年儉百姓不足宜寬簡省諸徭役其大赦天下普增位一等  
自王公以下在職者賜各有差

東晉穆帝立皇后大赦詔一首

制詔夫乾坤表二儀之象關睢明人倫之始是以咸恒敷化  
成之義風雅詠麟趾之美所謂正家而天下化朕以寡德纂  
承洪緒仰憑祖宗之靈仁愛之訓羣公卿士股肱之力用能  
克修憲章祇述古典今長秋肇建以正六宮粢盛有奉內化

有寄庶弘惟新形於政道思與億兆咸同斯慶其大赦天下  
東晉孝武帝立皇后大赦詔一首

制詔聖王居位同體二儀匪唯外政亦由內化是以釐降媯  
汭虞道以隆文定厥祥周德斯興欽若典禮長秋肇建體承  
天之儀齊關雎之義應斯奉時正體皇極軌躔壺闈徽音六  
宮夫乾坤定位則萬類陶育兩儀交泰則黎元和雍率土悅  
豫咸同斯慶大赦天下普增位一等

後魏孝靖帝納皇后大赦詔一首

溫子昇

門下朕以寡德繼戎寶命君臨億兆四海爲家願惟六宮宜  
有內主奉承宗廟必俟盛門渤海王以命時大才開物成務  
尅濟艱難匡復區夏俾予沖人有所憑賴自天作合實在大

邦造舟所歸物無異望王公卿士人謀旣從大筮元龜罔不  
襲吉率禮娉納正位紫宮今朱明在辰祝融御節蒼蒼品物  
成是南訛順時布恩蓋唯典故可大赦天下與人更始

東晉明帝立皇太子大赦詔一首

門下正位儲嗣以寧羣望是用稽古建茲東宮時胤洪基於  
靈符染君道於傳訓一人有慶兆庶同休大赦天下增位二  
等大酺三日

東晉孝武帝立皇太子大赦詔一首

門下夫古先哲王有國有家者必建儲貳之重以崇無窮之  
統所以欽奉祖宗克隆萬葉故嘉義表於陽秋守器著於周  
易朕以寡德纂承洪緒虛心慮畏若涉深海思樹靈根永固

遐業今東宮始建皇祚有寄社稷有慶豈惟朕躬將與億兆  
夷人咸同斯祐其大赦天下加位二等大酺五日布帛之賜  
主者詳爲之制其餘依舊

後魏孝靜帝立皇太子大赦詔一首

魏收

門下朕臨有天下將廿年宗廟歆祀羣生獲乂薄德之君何  
能致此皆由宰相勤王文武宣力上下協心神祇降祉有育  
椒宮未昇儲貳元輔百辟喻以格言且爰命副君嗣成先業  
此蓋有國之恆規前王之大典也今令月嘉辰少陽崇建無  
窮之慶豈獨朕躬加比軍國經紀非無勞役吏失其所互有  
怨侵永言念之思從休泰宜其中恩廣澤欣慰三才可大赦  
天下自武定七年八月十日昧爽已前謀反大逆已發覺未

發覺赤手殺人繫囚見徒之身悉原除之流配邊方未至配所亦皆聽免

宋孝武帝立皇太子恩詔一首

門下朕虔奉宗祧屬承艱運仰瞻先構罔識克崇思所以永貽皇緒傳之萬萬建茲初弱用貳統歷社稷有慶庶邦仰貞樂敷訓澤廣被黔首可賜天下爲父後者爵一級孝子順孫賜以粟帛

梁武帝立皇太子大赦詔一首

沈約

門下朕夙纘璿祚君臨四方夕惕夙畏若寘川谷思所以光闡洪基尅隆鼎命王公卿士咸以爲樹元立嫡有邦所先守器傳統於斯爲重是用俾茲幼蒙體乾作貳永固宗祀以貞



萬國元良之寄非獨在余宜洽嘉慶被之億兆可大赦天下  
賜人爲父後者爵一級

重立皇太子赦詔一首

門下朕臨馭萬邦懷焉祇畏夙夜自強罔知攸濟隨時麗澤  
因物爲心建立儲宮以寧區宇書不云乎一人有慶兆庶賴  
之思與率土同其介福凡天下罪無輕重已發覺未發覺侵  
散官物已上清議流徙并被禁錮在今年七月七日昧爽以  
前皆赦除之

立太子恩賚詔一首

沈約

門下朕屬當期運係迹前王恩所以長俗流祚垂之萬葉百  
辟咸以良寄有國莫先先哲后降及近代莫不立儲樹嫡

守器承祧乃旁挹羣議遠惟七百建茲蒙幼仰副宗祊承華  
肇闢崇基克永無疆之慶非獨在余思霑賚澤被之遐邇可  
賜天下爲父後者爵一級王侯以下量錫幣帛

後周武帝立皇太子大赦詔一首

制詔朕博觀載籍歷選前古粵自炎昊王度未詳降及夏殷  
彝章大備罔不崇建元子俾承洪業上繼宗祧下安羣望姬  
漢因循魏晉沿襲繼緒垂統於是乎在伏惟太祖文皇帝建  
茲皇極立我蒸人練石補天斷鼇約地時逢多難運屬樂推  
事極成功禮終臣節明皇帝天睞聖哲握紀君臨德邁望雲  
道高就日河海呈瑞則龜龍載文山岳效靈則風雲昭應朕  
以不德丕承天序宵分廢寢仄晷忘飡惕甚納隍懍踰馭朽

寤寐滋永延佇備巖念求人瘼思匡朝政公卿百辟億兆黎  
元抗表固陳請崇上嗣魯國公贊成德未紀遂膺儲禮仍加  
元服思與率土同茲嘉福可大赦天下

貞觀年中立皇太子大赦詔一首

門下朕祇膺靈命嗣守鴻基孜孜於政道兢兢於寶位中  
夜求衣日旰忘食十七載於茲矣實欲敦睦九族平章百姓  
濟斯人於仁壽及澆風於淳樸永言前載詳思至道以爲儲  
貳之重宗祧所繫不肖者旣爲億兆廢之明德者又爲社稷  
立之三善旣隆四海攸賴七廟之祀有寄萬代之祚方允元  
良之慶豈獨在于宜布愷澤被之率土可大赦天下自貞觀  
十七年四月七日昧爽以前大辟罪以下罪無輕重已發覺

未發覺已結正未結正皆赦除之

後周明帝誕皇太子恩降詔一首

制詔禮稱負子詩則斯男明兩作離前星表吉誕於甲觀生  
自畫堂欽茲一有以貞萬國宜與兆人共協嘉慶可降死至  
流降流至五歲刑五歲刑已下悉原免

後魏孝莊帝誕皇子大赦詔一首

溫子昇

門下有國三善事屬元夏本枝百葉義鍾繼體朕應天纂命  
握圖受籙景祚唯新卜年以永令月吉辰皇子誕育彩雲映  
日神光照殿方開博望將起龍樓遠近同歡人神共悅便可  
大赦天下與人更始自味爽以前謀反大逆已發覺赤手殺  
人繫囚見徒流配未至前所者一以原免若亡命山澤隱藏

軍器百日不自首者復罪如初

梁武帝誕皇子恩降詔一首

門下朕拓樹洪業光宅區宇而本枝之慶未廣椒掖騰衛之地猶闕藩屏言念弓韉未能忘懷第三兒始育磐石之基於焉彌固慶雖自己思加覃及凡死罪可降一等五歲刑降二等三歲刑以下並悉原散唯釁加在三及殺祖父母不在降例

東晉元帝誕皇孫大赦詔一首

門下朕以不德昧於政道自陟帝位迄今五載雖四海宅心然頑凶未夷封豕長蛇薦食上國夫保大之功在於經武物無幽否然後大享事不暫勞則不得永逸是故命大將遣眾

軍埽定中原在此行也自頃彝倫失序強弱兼并並列齊萌而相爲私隸是以極出良人以備甲卒而百姓之費公家之出不得操事計以萬數又大化未溥麗刑者眾牧人者以苛爲察庶獄未清朕恆憂歎皇嫡孫載育百葉之本月正元日品物革變思令兆庶沛然從善其大赦天下

後魏孝文帝誕皇孫大赦詔一首

門下朕纂承大業十有四年未能祇奉天地道合陰陽令五行順緒化致時邕顧惟寡薄載懷慙懼宗廟之靈以今月十八日皇孫誕育既有嘉慶思與億兆同之可大赦天下咸與更始

貞觀年中誕皇孫恩降詔一首

門下固宗祧者允屬元良隆本枝者實資祚胤周德所以休  
明漢歷於焉長久朕祇奉靈睭臨御帝圖天地降祉宗社垂  
祐令月嘉辰嫡孫誕育祥發高禔事踰甲觀一人之慶旣洽  
萬葉之祇無疆宜布凱澤被之億兆天下見禁囚徒咸宜降  
罪死罪從流流從徒徒以下罪並放其犯十惡常赦所不免  
官人枉法受財監臨主守白盜盜所監臨劫賊傷人故殺人  
謀殺人已加功者並不在降限內外官職事五品以上子爲  
父後者各加勳官一轉天下大酺五日其去年收儉之處百  
姓旣有少乏不在大酺之限

東晉成帝加元服改元大赦詔一首

門下朕以薄祐少遭閔凶仰瞻增構孤榮眇然賴祖宗之靈

宰輔之訓羣公卿士之力用尅堪軌度免諸艱難冠禮之始  
嘉事之重皮告宗廟進納元服於成德之不易實有惕於乃  
心將與兆庶饗茲寵祚其大赦天下改咸和十年爲咸康元  
年增文武一等大酬三日賜百官官銀鰥寡孤獨米五斛  
梁武帝皇太子冠赦詔一首

門下太子養器春方式備成德休辰肇歲元服顯加洪基云  
固大業克永豈止禮茂三服實亦慶覃兆庶凡罪無輕重未  
結正者皆赦除之已結正者皆量所優降王公以下宿衛文  
武並加班賚爲父後者賜爵一級勤事之職霑以勞位主者  
可詳舊施行

東晉孝武帝皇太子納妃班賜詔一首



制詔太子婚禮既就仰祖宗遺烈憑道德之資保傅獎翼賢士竭誠慎行無違勉及成德積善慶隆豈惟在予夫大賚班錫所以宣其悅情其便依舊有賜

梁武帝皇太子婚降大辟以下罪詔一首

門下太子藉訓師保年業克富吉日惟良式昭婚禮道備春宮德光幾望本枝方固慶兼黎元思弘渥惠以被遐邇凡大辟以下及諸彈坐可並詳降處主者爲條格施行

宋孝武帝講武原降詔一首

門下昔人稱人道何先莫先於兵雖淹紀勿用忘之必危朕以聽覽餘閑講事西郊朝授鉅節士遵師令坐作有序進退無爽良用欣焉軍幢以下普量班賚頃化弗能行而人未知

禁官役違調起觸刑網朕每矜之凡諸逃亡在今昧爽以前  
悉皆原罪已滯囹圄者釋還本役其逋負在大明三年以前  
一停督責自此以貧疾老弱詳所申減所上伐蠻之家蠲稅  
半年近藉巧新制所在承用多謬可普更符下聽以今爲始  
若先已犯制亦同蕩然

宋孝武帝春蒐大赦詔一首

門下朕受天慶命十一年於茲矣憑七廟之靈獲上帝之力  
禮橫四海威震八荒方巡三湘而奠衡嶽夕九河而檢岱宗  
今談臥功成優遊政化雲至鷁降省風畿外兼觀臺六合之  
首蒐校長洲之表命荆江而起翻詔充豫而馳足搖嶽潒海  
騰沙飛礫鼓晉合序鑣提協節入獻祀典饁獸填郊故張樂

楊宮饗戎星樓敬舉王公之觴廣納士人之壽八風修通卿  
雲叢聚盡天韜瑞率宇竭歡思散太極之泉以福無方之元  
可大赦天下行幸所經無出今歲租布其逋餘責負勿復收  
賜人爵一級女子百戶牛酒邦守邑宰及人夫役從蒐者普  
加霑賚

宋孝武帝巡幸歷陽郡大赦詔一首

門下背羣黨假權天威震曜雖致尊制令日月貞明而內屏  
外扞猶勤先鑒朕以幼年早承寵樹朝議晏罷首述藩道而  
憂弗身先運屬凶危雖克定禍亂重創鴻緒感尋情事痛崩  
心目今威加四海望秩滄嶽自去此境廿餘載少壯零落童  
齔成人里邑荒耗軍府殘悴觀政臨原將百常慨出不逾時

同鑾有日暫盡帳飲之歡思廣雲雨之施可大赦天下南豫  
州別署敕繫長徒一切原散其兵廝考襲謫代悉停徙朕昔  
初出鎮將吏賜位二等有犯賊汙勒注特宜蕩除與之更始  
軍身服役嘗經齊內免爲平人

以下闕